

子部

概覽

四库家藏

綱領

曰思無邪也。謝語詩三百一言以蔽之曰思無邪。程氏曰思無邪誠也。

子部典籍概覽（三）

山東畫報出版社





子部典籍概览

(三)

◎ ◎
张新奇 [清] 永 璐 等
宋建勋 李智勇
整理 撰



卷 四 十 二

杂家类存目九

1995 《群书摘草》五卷 左都御史张若淮家藏本

明王国宾编。国宾号养默，武进人。万历甲戌进士。其作此书时，方监榷杭州北新关，未详其终于何官也。其书仿庾仲容《子钞》、马总《意林》之例，摘取《家语》以下至明张时彻《说林》三十二种，附以兵书七种。每种各摘数段，无所持择，盖亦当时书帕之本。

1996 《闺范》四卷 浙江巡抚采进本

明吕坤撰。坤有《四礼疑》，已著录。此编乃其为山西按察使时所作。前一卷为嘉言，皆采六经及《女诫》《女训》诸文为之训释。后三卷为善行，分女子、妇人、母道各一卷。叙其本事，而绘图上方，并附以赞。文颇浅近，取易通俗也。当时尝传入禁中，神宗以赐郑贵妃，妃重刻之。后妖书案起，遂以是书为口实。朱国桢《涌幢小品》曰：“吕新吾司寇廉察山西，纂《闺范》一书。焦弱侯以使事至，吕索序刊行。弱侯亦取数部入京，郑贵妃之侄国泰乞取添入后妃一门，而贵妃与焉。众大哗，谓‘郑氏著书，弱侯交结为序，将有他志’”云云。所纪与史小异。然国桢与焦竑为友，目睹刊本，所记似得其真。此本无郑贵妃序，当为坤之原本也。

1997 《百子咀华》十四卷 两江总督采进本

明胡效臣编。效臣字钟衡，黄州人。万历丙子举人，官旌德县知县。是书取诸子之文而割裂之，或摘其一段，或拾其数语，或撮其数字，以供时文獭祭之用。首列《左传》，次六子，次子汇，次则以儒家、道家、法家、兵家分类，又以明人所著参错于古人之中。不知其体例何

在。又题曰焦竑批评。竑之陋何至于此，其依托可不问而知也。

1998 《琅琊代醉编》四十卷 编修汪如藻家藏本

明张鼎思撰。鼎思有《琅琊曼衍》，已著录。是编乃其自给事中滴滁州驿丞时杂钞诸史百家之言，胪次成书。名曰“代醉编”者，欧阳修在滁州时有醉翁亭，鼎思适宦其地，以著书代饮酒也。其书体例庞杂，无所折衷考订，特借以消闲遣日而已。

1999 《兰芳录》二卷 江苏巡抚采进本

明徐三重撰。三重有《馥言》，已著录。是编皆录古人轻世遗荣之事，分内、外二篇。自序谓《内篇》近自得，《外篇》稍假物缘，亦不入世累。然曾点之沂水春风置之《外篇》，叶梦得之读书饮酒置之《内篇》，殊不晓其优劣之旨。首冠以《论语》饭疏食一章，贤哉回也一章，别题曰“孔颜乐事”，又不在内、外篇之数，则恐失讲学本色耳。

2000 《警语类钞》八卷 安徽巡抚采进本

明程达撰。达字顺甫，清江人。万历丁丑进士，官至漳泉兵备道。是编取先哲格言善行，分类编次。其目六十，割裂冗杂，殊无伦次。凡例云：“是编重理学，故诸儒要语独详”。然于仙则信淮南之上升，王母之降汉；于释则言灭佛之报应，谈禅之超悟，均不免自乱其例也。

2001 《诸经品节》二十卷 通行本

明杨起元编。起元有《证学编》，已著录。是编删纂道、释二家之书。道家凡《阴符经》《道德经》《南华经》《太玄经》《文始经》《洞古经》《大通经》《定观经》《玉枢经》《心印经》《五厨经》《护命经》《胎息经》《龙虎经》《洞灵经》《黄庭经》十六种。释家凡《楞严经》《维摩经》《心经》《金刚经》《六祖坛经》《圆觉经》《楞伽经》《药师经》《法华经》《无量经》《弥陀经》《孟兰经》十二种。扬雄《太玄》本为拟易，诸史皆著录于儒家，此引之道家，殆晋人老、易归一之旨。至列子《冲虚经》删而不载，又不明其故矣。起元传良知之学，遂浸淫入于二氏，已不可训。至平生读书为儒，登会试第一，官跻九列，所谓国之大臣，民之表也，而是书卷首乃自题曰比丘，尤可骇怪矣！

**2002 《沈氏学彙》 浙江巡抚采进本**

明沈尧中撰。尧中字执甫，嘉兴人。万历庚辰进士，官至刑部尚书。其自序曰：“为纲二十有四，为目三百五十有八，皆宇宙内鸿巨之事，非草木鸟兽之类。”然杂采旧文，无所考订，亦无所别择。如日月星宿诸占，全录《天官书》，而不知太初之法最为疏漏。论《周官》则过信俞庭樵之说，以为《冬官》不亡，散见五官，而不知割裂五官，有乖经义，盖杂驳之学也。

2003 《霞外塵談》十卷 浙江巡抚采进本

明周应治编。应治字君衡，鄞县人。万历庚辰进士。杨德周序，称为观察，不知官何省何道也。是书辑隐逸高尚之事，分霞想、鸿冥、恬尚、旷览、幽赏、清鉴、达生、博雅、寓因、感适十类。大抵以《世说新语》为蓝本，而稍以诸书附益之。至于《云仙散录》、师古伪《杜诗注》之类，影撰故实，亦皆拊拾，殊无别裁。又多不见原书，辗转裨贩。如“披裘公不取遗金”、“王摩诘诗中有画”、“列子郑人蕉鹿”诸条，尤割裂不成文理。至于宗慤乘风破浪，鲍生爱妾换马，全与高隐无关，不过杂凑以盈卷帙耳。

2004 《宋贤事汇》二卷 浙江汪启淑家藏本

明李廷机撰。廷机有《汉唐宋名臣录》，已著录。是编杂采史书说部所载宋人行事，分为四十三类。首有自序，谓“宋之世风人材，颇类今日。言论行事，往往有可用者”云云。宋、明之季，儒者如出一辙，此类亦可以观矣。

2005 《说类》六十二卷 安徽巡抚采进本

明叶向高编，林茂槐增删。向高字进卿，号台山，福清人。万历癸未进士，官至东阁大学士，谥文忠。事迹具《明史》本传。茂槐有《诸书字考》，已著录。是书摘唐、宋说部之文，分类编次。每类之下，各分子目。每条下悉注原书。然皆习见之典，别无新异。其上细书评语，体例尤为近俗。

2006 《遁世编》十四卷 两淮盐政采进本



明钱一本撰。一本有《像象管见》，已著录。是编纪古来隐逸之士，自唐虞至元，分神隐、真隐、儒隐、节隐、侠隐、哲隐、达隐、高隐、别隐九类。芜杂殊甚，疏漏尤多。如不知姓名谓之真隐。然所谓阮籍遇苏门山人即是孙登，不得曰无姓名也。又顾阿瑛以晚年祝发人之别隐，褚伯秀本为黄冠乃人之高隐，梁鸿无排难解纷之事乃人之侠隐，林灵素诡譎羽流亦目曰别隐，皆未为允协。其他亦多科配未确，简择未当者。一本研心经学，所著《易解》，能自成一家之言，不应此书独乖刺如是。盖一本以建言罢归，姑借此以抒忘情仕宦之志，考据则非其所留意也。

2007 《廉平录》五卷 江苏巡抚采进本

明傅履礼、高为表同撰。履礼题长芦盐运司知事，为表题沧州学正，其始末均未详也。是书采前代至明事迹，分类编辑。凡《廉录》三卷，曰卿相，曰馆阁，曰宪台，曰省郎，曰监司，曰守令，曰武臣。《平录》二卷，由畿内，曰外藩，曰郡州，曰列县。廉者操守，平者听断也。每类之中，各以时代为次。万历戊子，长芦巡盐御史东莞谭耀刻之，盖耀命二人编辑，以充书帕者耳。

2008 《焦氏类林》八卷 江西巡抚采进本

明焦竑撰。竑有《易筌》，已著录。是编前有自序，谓“庚辰读书有感葛稚川语，遇会心处辄以片纸记之。残稿委于篋笥，李君士龙见之，乃手自整理，取《世说》篇目括之。其不尽者括以他目，譬之沟中之断文以青黄，则士龙之为也”。士龙为上元李登字。然则竑特偶为标出，而成此书者则登也。凡分五十有九类，皆非奇秘之文。

2009 《二十九子品汇释评》二十卷 江苏周厚堉家藏本

题曰翰林三状元会选。前列焦竑、翁正春、朱之蕃三人名。其书杂录诸子，毫无伦次。评语亦皆托名，谬陋不可言状。盖坊贾射利之本，不足以当指摘者也。

2010 《田居乙记》四卷 浙江巡抚采进本

明方大镇撰。大镇有《荷薪义》，已著录。是编乃其家居读书时所



作。自序谓：“遇有赏心，辄乙其处，命儿子录之，故名‘乙记’”。分四门：一曰潜见，分记学、记仕二子目；二曰筌宰，分记君、记臣二子目；三曰伐阅，分记操持、记作用二子目；四曰居息，分记家论、记性命二子目。所录虽皆前人格言善事，然条缀原文，无所阐发。其出处或注或否，体例亦不画一。

2011 《省括编》二十三卷 编修励守谦家藏本

明姚文蔚撰。文蔚有《周易旁注会通》，已著录。是编采史传中先机应变之迹，自春秋至元季，汇为一书。分言、事、兵为三类。以“省括”名编，盖取太甲若虞机张往，省括于度则释之义。然兵亦事也，分类未允。间有论断，亦未见特识。特书生好谈作用者耳。

2012 《智品》十三卷 安徽巡抚采进本

明樊玉衡撰，於伦补葺。玉衡字玄之，万历乙未进士，官昆山县知县。伦字惇之，万历辛丑进士，官至右通政。皆黄冈人。是编搜辑古初至明代用智之事，分为七门。一曰神品，察兆于未萌者也。二曰妙品，知幾于将至者也。三曰能品，救败于已然者也。四曰雅品，端士之善应变者也。五曰具品，小才之偶见长者也。六曰满品，纯任术者也。七曰盗品，阴贼害正者也。杂隶古事，而皆不著其所出。如赵简子欲杀孔子之事，出宋人伪《子华子》。管仲诸事，出《管子·轻重》诸篇。词皆依托，而信为实然，未免失于考证。又辅过、绌疵得列神品，与大禹同科，而文王、周公乃仅入妙品，殊为倒置。至窦良女蜡书灭贼，厥志可尚，而乃列之盗品中，尤乖刺矣。

2013 《再广历子品粹》十二卷 江苏周厚堉家藏本

旧本题明汤宾尹编。宾尹字嘉宾，宣城人。万历乙未进士，官南京国子监祭酒。考《明史·艺文志》及《江南通志》皆无此书名。卷前题为百大家批评，会元汤宾尹辑，诸名笔录注，书林余象斗梓。前有宾尹序，称“双峰堂余君，侵正历子行矣，爰授以广历子”云云。卷端称《再广历子》，中缝又称《续广历子》，已参错无绪。而所列二十四家子书，又多杜撰名目。如《六韬》谓之尚父子，《诗外传》谓之韩诗子，《潜



夫论》谓之王符子，《忠经》谓之马融子，刘昼《新论》谓之孔昭子，《论衡》谓之王充子，前、后《出师表》谓之孔明子，《陆贽奏议》谓之陆宣子，《骆宾王集》谓之宾王子，殆于一字不通。宾尹虽仅工诗文，原非读书稽古之士，亦不荒谬至此，疑或托名欤？

2014 《续说郭》四十六卷 通行本

明陶珽编。珽，姚安人。万历庚戌进士。是编增辑陶宗仪《说郭》，迄于元代。复杂钞明人说部五百二十七种以续之，其删节一如宗仪之例。然正、嘉以上，淳朴未漓，犹颇存宋、元说部遗意。隆、万以后，运趋末造，风气日偷。道学侈称卓老，务讲禅宗。山人竞述眉公，矫言幽尚。或清谈诞放，学晋、宋而不成。或绮语浮华，沿齐、梁而加甚。著书既易，人竞操觚。小品日增，卮言叠煽。求其卓然蝉蜕于流俗者，十不二三。珽乃不别而漫收之，白苇黄茅，殊为冗滥。至其失于考证，时代不明。车若水之《脚气集》以宋人而见收，鲜于枢之《笺纸谱》以元人而阑入，又其小疵矣。

2015 《智囊》二十八卷 内府藏本

明冯梦龙编。梦龙有《春秋衡库》，已著录。是编取古人智术计谋之事，分为十部。亦间系以评语，佻薄殊甚。

2016 《智囊补》二十八卷 内府藏本

明冯梦龙撰。梦龙先于天启丙寅成《智囊》一书。以其未备，复辑此编。其初刻《补遗》一卷，亦散入各类。

2017 《谭概》三十六卷 内府藏本

明冯梦龙撰。是编分类汇辑古事，以供谈资。然体近俳谐，无关大雅。

2018 《知非录》二卷 浙江巡抚采进本

明黄时耀编。时耀字德韬，号我素，新都人。是书成于万历庚子。杂钞诸书，分为内、外二篇。《内篇》之目凡六：首立志、次为学、次存心、次检身、次处家、次应世。《外篇》之目凡三：曰闲适、曰摄养、曰禅观。各目之中又自分子目，颇为糅杂。其《内篇》剿取《近思录》《自警



编《读书录》《白沙集》《传习录》《居业录》《击壤集》等书汇合而成，端绪已多岐出。《外篇》则竟涉异学矣。盖心学盛行之时，无不讲三教归一者也。

2019 《学古适用篇》九十一卷 浙江巡抚采进本

明吕纯如撰。纯如字孟谐，一字益轩，吴江人。万历辛丑进士，官至兵部侍郎。是编采前代至明凡前事之可为后法者，分类编次为九十一门，亦间附以论断。前有自序，谓“冯慕冈《经世实用》，义在宪章当世，而明以前存而不论。冯琢庵《经济类编》，罗列虽多，间或不适于用。万思默《经世要略》，其扬摧者止于就人汇事，未尝就事求人”。兹编大意，仿三书之体，而所列事迹则以适于用者为主。然事变靡常，情势各异，譬之古方今病，贵于临证详求，亦未可执以一定之法，遽谓之适于用也。

2020 《经史典奥》六十七卷 浙江巡抚采进本

明来斯行编。斯行，萧山人。万历丁未进士，官至福建右布政使。是编于经取《易》《诗》《书》《春秋》《左传》《礼记》《周礼》，于史取《史记》、前、后《汉书》，各摘其字句标题于前，而以经史原文及注详列于后，盖以备词章采择之用，不为考证设也。斯行自序云：“昉迹于《汉隽》诸篇”。然考林铎《汉隽》，随事辑类。此则不分门目，逐卷钞撮，专采字句之可用者。盖近司马光《徽语》之例，非《汉隽》例也。书凡六十七卷，而序云八十六卷。岂其后有所归并，未及追改前序欤？

2021 《宗藩训典》十二卷 江苏周厚堉家藏本

明冯柯撰。柯字贞白，慈溪人。以荐举侍襄靖王书堂。是编即奉襄王令所作。取史书中诸藩封行事可为劝戒者，摘录其略，各系以评。起秦、汉迄金、元，得宗属七百二十三，附与事之臣八十六，共为评一千一百三十八。万历壬寅，其子瑛进之王府，命工刊刻。

2022 《清寤斋欣赏编》一卷 江苏巡抚采进本

明王象晋撰。象晋有《群芳谱》，已著录。是书分六类：曰葆生要览、曰傲身懿训、曰佚老成说、曰涉世善术、曰书室清供、曰林泉乐事，



皆摭明人说部为之，犹陈继儒诸人之习气也。

2023 《稗史汇编》一百七十五卷 浙江吴玉搢家藏本

明王圻撰。圻有《东吴水利考》，已著录。是书搜采说部，分类编次，为纲者二十八，为目者三百二十，所载引用书目凡八百八种，而辗转裨贩，虚列其名者居多。如《三辅决录》《吴录》《三齐略记》《太原记》《湘中记》《鸡林志》《申子》《尸子》之类，圻虽博洽，何由得见全帙？又卷首虽列书名，卷中乃皆不注出处。是直割裂说部诸编，苟盈卷帙耳。

2024 《增定玉壶冰》二卷 浙江巡抚采进本

明闵元衡编。元衡有《罗江东外纪》，已著录。初，都穆采古来高逸之事，题曰《玉壶冰》。宁波张鼐愿稍删补之，题曰《广玉壶冰》。元衡以为未尽，复增定此编，分纪事、纪言为二卷。仍列穆之原书，于所加者则注“增”字以别之。山人墨客，莫盛于明之末年，刺取清言，以夸高致，亦一时风尚如是也。据《浙江通志》，此二卷外尚有《补玉壶冰》一卷，亦元衡所著。此本不载，殆偶佚欤？

2025 《古今长考》八卷 两江总督采进本

明黄文昭撰。文昭字季弢，晋江人。万历中诸生。是编辑周、秦以迄明代忠厚长者之事，大抵皆取其一节，故人品不甚别择。末附别品六则，则似薄而实厚者。其导俗之心甚善，书则不免芜杂也。

2026 《洵词记事钞》一卷 附《明良记》四卷 江苏巡抚采进本

明李鶚翀编。鶚翀字如一，江阴人。《洵词》本崔铣所著文集。鶚翀摘其论宋事及明初事迹者六十一则为书，其不涉记事者皆不录。《续钞》三十六则，皆前所挂漏也。鶚翀自题云：“前钞成于庚子秋，备阅七载。今春衰诸说部梓行之。发篋得前钞，因同杨宪副二记附为一帙”。今二钞之后惟杨仪《明良记》四卷，前有鶚翀小引，称与《保孤》一记皆系秘本。则所谓二记者，乃合《保孤记》言之，而此本佚其一耳。

2027 《清赏录》十二卷 浙江鲍士恭家藏本

明张翼、包衡同撰。翼字二星，余杭人。衡字彦平，秀水人。二人

皆久困场屋，弃去制义，因共购阅古书，采摭雋语僻事，积而成帙。一刻之秀州，一刻之武林。翼游盘谷，又重刻焉。然多习见之词，特剽剟成书，无裨考据。

2028 《十可篇》十卷 浙江巡抚采进本

明马嘉松编。嘉松字曼生，平湖人。万历末诸生。是书摘录子史及诸家小说，分为十篇：曰可景、可味、可快、可鄙、可混、可坦、可远、可谐、可嘉、可删。前有陈继儒序及自序。其可景、可味、可嘉三编多取古人嘉言善行以为法，余七编多取古人丑行败德以为戒。然征引错杂，绝无体例，评语尤多伤轻薄。

2029 《舌华录》九卷 浙江巡抚采进本

明曹臣撰。臣字荃之，歙县人。是书取前人问答雋语，分类编辑，凡十八门。《世说新语》之余波也。所录皆取面谈，凡笔札之词不载，故曰“舌华”。取佛经“舌本莲华”之意。上起汉魏，下逮明人，颇为猥杂。原序亦自言：“近时之事，多所润饰”。则非尽实录可知矣。

2030 《元壶杂俎》八卷 安徽巡抚采进本

明赵尔昌撰。尔昌字庆叔，钱塘人。官宣城县知县。是书杂采史传说部，钞合成编。分胜事、名言二纪，各为四卷。大致欲仿沈括《清夜录》、周密《澄怀录》之体，而采掇芜杂，或注所出，或不注所出，亦无定例，不过陈继儒之流耳。前有万历辛亥筮继序，称“采之古者什七，裁之今者什三”。则其随意成书，不尽有典据可知矣。

2031 《教家类纂》八卷 编修励守谦家藏本

明薛梦李编。梦李字近泉，嘉兴人。是书成于万历壬子。摭取前人家训及劝善诸书荟萃成编，附以议论，分四门：首图说、次敦伦、次治家、次省身。其言浅近，盖专为愚蒙而说。图说摭拾凑合。深者为心学诸图，非常人所解。俚者至于绘画故事，系之以说，如云“这一个门内站的人是某朝某人”云云，又失之太鄙，亦殊芜杂不伦也。

2032 《益智编》四十一卷 浙江巡抚采进本

明孙能传撰。能传有《溢法纂》，已著录。是书成于万历甲寅。凡



分十有二类：曰帝王、曰官掖、曰政事、曰职官、曰财赋、曰兵戎、曰刑狱、曰说词、曰人事、曰边塞、曰工作、曰杂事。每类各为子目，凡七十有四。俱杂采古来设奇应变之事，间附评语。其凡例有曰：“期于尽事而止，不复注所出书”。又曰：“所采事多断章取义，其始末应述，不及致详”。又曰：“是编雅俗并收，事多踳驳，但取益人意智，真贋勿问之矣”云云。是其书之不足据，能传已自言之矣。

2033 《法教佩珠》二卷 山西巡抚采进本

明林有麟撰。有麟有《青莲舫琴雅》，已著录。是书成于万历甲寅。杂采儒先格言及二氏因果之语。前有许乐善序，称其“撷菁华于三教，漱芳润于百家”。则固明言其杂以释、道，非纯然儒者之书矣。

2034 《经世环应编》八卷 内府藏本

明钱继登撰。继登字尔先，又字龙门，嘉善人。万历丙辰进士，官至金都御史。是书所采皆史籍权变之术，亦《省括编》之流也。

2035 《愧林漫录》十卷 浙江巡抚采进本

明瞿式耜撰。式耜字起田，常熟人。万历丙辰进士，官至右金都御史，巡抚广西，晋文渊阁大学士，兼兵部尚书。大兵下广西，抗节死之。事迹具《明史》本传。乾隆四十一年赐谥忠节。是编成于崇祯丙子。杂钞诸儒之言，分为学问、居心、规家、酬世、在位、积德、读书、究竟、摄生、依隐十篇。儒墨兼陈，盖林居时录以自警。大旨归于为善而已，非辨别学术之书也。

2036 《掌录》无卷数 安徽巡抚采进本

旧本题绣云居士撰。不著姓名时代。其钞书格纸，边页刊绣云居士，盖犹其手稿。卷首小序之末有私印曰李格，而卷中“天台陈刚中”一条下有自注亦称“格少失妃侍”。则李格所作。又“上阌”有一条云：“吾邑顾升伯入丁未会场，特落一人名而登所善门生李光元。”考文秉《定陵注略》，载万历丁未汤宾尹为同考官，有阴毁申时行子殊卷，而改中江西李光元事，非顾升伯。所记为误。然可知格为万历以后人也。其书杂钞说部，漫无体例。多取之于说郭，亦无异闻。其曰“掌

录”，意其取《拾遗记》苏秦、张仪录书掌中事也。

2037 《检囊随笔》三十卷 两江总督采进本

明杨宗吾撰。宗吾字伯相，成都人。官锦衣卫指挥。大学士廷和之曾孙，修撰慎之孙也。是书为类二十有四，采掇琐碎，分条编载，体近类书，而当时邸报及其祖父遗事亦间附焉。又有数条乃驳陈耀文《正杨》之非，及陈建《通纪》载杨廷和事之误。又丽句、琐语二门，专取诗文词藻，与全书体例皆不相类，殊为猥杂。自序称“不问人之弃取，惟意是采，今古驳杂，积成数卷”。盖亦道其实也。

2038 《厚语》四卷 浙江巡抚采进本

明钱蓑撰。蓑字懋登，海盐人。万历中由贡生官于潜县训导。是编皆录长厚之事可为世法者，故曰“厚语”。分十六类，皆以明人居前，而古事以类列于后。其凡例谓“耳目所逮，尤易信从”云。

2039 《偶得紺珠》一卷 内府藏本

明黄秉石撰。秉石字复子，江宁人。万历中以荐为推官，官至严州府同知。是编杂采诸书，恒订少绪，又多不注出典。盖随手笔记，未有詮次体例也。

2040 《培壘居杂录》四卷 浙江巡抚采进本

明郑端允编。端允字思孟，海盐人。郑晓之曾孙也。是书杂采诸家劝戒之言，至《太上感应篇》亦所不遗。虽意主训海，而其言不尽出于儒者，盖杂家流也。

2041 《广百川学海》无卷数 两江总督采进本

旧本题明冯可宾编。可宾，益都人。天启壬戌进士。是编于正、续《百川学海》之外，摭拾说部以广之，分为十集，以十干标目。然核其所载，皆正、续《说郛》所有，版亦相同。盖奸巧书贾于《说郛》印版中抽取此一百三十种，别刊序文目录，改题此名，托言出于可宾也。

2042 《湘烟录》十六卷 浙江吴玉埤家藏本

明闵元京、凌义渠同编。元京字子京，乌程人，义渠之舅也，未详其所终。义渠字骏甫，此书亦题为乌程人，而太学题名碑作归安人，盖



二县同为湖州倚郭也，天启乙丑进士，官至大理寺卿，崇祯甲申殉国难。世祖章皇帝赐谥忠介，事迹具《明史》本传。其人自足不朽，而其书乃不出明末山人之习。所分咫闻、清检、兰讯、鼎书、奄史、谈嘲、金荃、补革、志谄、目偏记十门，标名诡异，大致欲仿段成式《酉阳杂俎》。其杂采新事，各注所出之书，则欲仿冯贽《云仙杂记》，意在标举幽异，而不免于剽窃类书。如杜甫“旧雨今雨”之语见于本集，原非僻书，而注曰《六帖》，不知白居易《六帖》无唐事，有唐事者乃宋孔传《续六帖》。是既已疏漏，且复舛误。又卷首参订姓名列董斯张为第二，而书中多引《广博物志》，即斯张所纂类书。既非其所自撰，何不出斯张所著书名乎？据拾无根，斯亦显证矣。

《云笈淡墨》六卷 浙江吴玉璠家藏本

明木增撰。增字生白，云南丽江土司，世袭土知府。以助饷征蛮功，晋秩左布政使，年甫三十，即谢职。天启五年，特给诰命以旌其忠。增好读书，多与文士往还。是书盖其随笔摘钞之本，大抵直录诸书原文，无所阐发。又多参以释典、道藏之语，未免糅杂失伦。特以其出自蛮陬，故当时颇传之云。

2044 《子史碎语》二十四卷 浙江巡抚采进本

明胡尚洪编。尚洪字叔开，宣城人。是编成于天启丙寅。《明史·艺文志》著录。然皆采摭诸书，恒订而成。分造化、人事、君道、臣术四门，又分子目三百八十有三。烦碎冗杂，无复条理。《三坟》《天禄阁外史》《心书》之类，皆伪妄显然者，亦皆采录。至如割裂郭象《庄子注》谓之郭子，亦自我作古，前此未闻也。

2045 《诸子拔萃》八卷 内府藏本

明李云翔编。云翔字为霖，江都人。是书成于天启丁卯。取坊本《诸子汇函》割裂其文，分为二十六类。其杜撰诸子名目，则一仍其旧。古今荒诞鄙陋之书，至《诸子汇函》而极。此书又为之重儻，天下之大，亦何事靡有也！

2046 《摘湖樵书》十二卷 安徽巡抚采进本



明来集之撰。集之有《读易隅通》，已著录。是书初编六卷，二编六卷。皆采摭唐、宋、元、明诸家之说，以类相从，排纂其文。而总括立一标目，或杂引古书而论之，或先立论而以古书证之。征摭繁富，颇有考证之处。而细大不捐，芜杂特甚，亦多有迂僻可笑者。如《论经篇》中引《名贤录》所载宋章樵遇李全之乱，率诸生盛服坐堂上讲诵，寇至敛刃而退事。又引《宋濂集》所纪宋郑霖讲《中庸》一篇，使寇退不敢攻城事。以为读经之效，胜于修斋。其他引读经却鬼治病事，不一而足。然则以孔门圣籍为二氏之符箓经忏矣。

2047 《博学汇书》十二卷 内府藏本

明来集之撰。凡读书所得，随笔记录，不分门目。惟以类相从，鳞次栉比，俾可互证。视他书丛杂无次者，较为过之。然所采多小说家言，如《拾遗》《洞冥》诸记，是岂足取以为据乎？

2048 《尧山堂外纪》一百卷 浙江鲍士恭家藏本

明蒋一葵撰。一葵字仲舒，常州人。尧山其读书堂名也。是书取记传所载轶闻琐事，择其稍僻者，辑为一编。上起古初，下迄明代，每代俱以人名标目。雅俗并陈，真伪并列，殊乏简汰之功。至以明诸帝分编入各卷之中，尤非体例矣。

2049 《家规辑要》无卷数 江西巡抚采进本

明胡铨撰。铨有《拾遗录》，已著录。是书仿温公《家范》、吕氏《乡约》之意，采辑旧文，排纂成编。大概为中人以下设也。

2050 《笔记》二卷 浙江孙仰曾家藏本

明陈继儒撰。继儒有《邵康节外纪》，已著录。此书取杂事碎语，钞录成帙，略无伦次。惟所载陆完《跋颜书朱巨川告身》一篇，为《铁网珊瑚》《清河书画舫》诸书所未收，亦可以备参考。然已载所著《见闻录》中，此亦复出也。

2051 《读书十六观》一卷 浙江孙仰曾家藏本

明陈继儒撰。采古人成语，自“吕献可”以下凡十六条，联缀成编，以为读书之法。命名之义，盖拟浮屠氏之《十六观经》也。后有跋云：

“写前观毕，梦有老人自称斫轮翁”云云。虽本寓言，究涉荒渺。此编尝刻入《秘笈》中，与书、画史误合为一。今析出别著于录焉。

2052 《群碎录》一卷 内府藏本

明陈继儒撰。其书随笔纪录，不暇考辨，故以“群碎”为名。前有自跋，谓“读书者一字一语不忍弃之”。然不应琐杂如是也。

2053 《珍珠船》四卷 内府藏本

明陈继儒撰。是书杂采小说家言，凑集成编，而不著所出。既病冗芜，亦有讹舛，盖明人好剿袭前人之书而割裂之，以掩其面目。万历以后，往往皆然，继儒，其尤著者也。

2054 《销夏》四卷 内府藏本

明陈继儒撰。其书杂录清胜之事，取其可以销夏。如冰荷玉帐见于诸小说家者，靡不采录。纤仄琐碎，亦可谓徒费心力矣。

2055 《辟寒》四卷 内府藏本

明陈继儒撰。继儒既作《销夏》四卷，又成此书，义例与《销夏》相类。如狨座、蹲鸱之类，皆泛载之，尤为拉杂。

2056 《古今韵史》十二卷 副都御史黄登贤家藏本

明陈继儒撰。是书摭拾诸书雋语，分类编次。凡韵人二卷，韵事二卷，韵语三卷，韵诗二卷，韵词二卷，韵物一卷。皆以古事与明人事参录，亦《世说新语》之支流，而纤佻弥甚。

2057 《福寿全书》无卷数 内府藏本

明陈继儒撰。皆录前贤格言遗事，自惜福以至好还，凡分二十类。多以因果为说，盖意在惩恶劝善。而征引糅杂，遂近于小说家言。

2058 《广销夏》一卷 《广辟寒》一卷 《销夏补》一卷 《辟寒补》一卷 《销夏》再一卷 《辟寒》再一卷 《寒夏合》再一卷 编修励守谦家藏本

明周诗雅撰。诗雅有《南北史钞》，已著录。是编本陈继儒《销夏》《辟寒》二书，更著此以推衍之。编拾丛杂，较之继儒原书，风更下矣。

2059 《可如》六卷 浙江巡抚采进本

明董德鏞撰。德鏞字孔昭，鄞县人。其书取禽兽鱼虫之事合于忠孝节义者，分类摘录，共六十三门。每门又各为标目，皆冠以“可如”二字。如云“可如鸭”、“可如鹅”之类，颇为近俚，自序谓：“诸书所载，散见而不聚，隐而义未显，故特表以出之。其名禽兽鱼虫，其事则人也。其曰可如者，盖心存乎劝戒也。”逐条之下，附以评语。大抵愤世嫉俗之词，有所激而然也。昔开封阮汉闻嫉明末将帅之怯懦，因辑古来妇人行兵制胜之事，编为二卷，题曰《女云台》，以深愧之。德鏞此编，其用意与之相类。盖明之末造，人心世道无不极敝，故士大夫发愤著书，往往如是云。

2060 《枕函小史》无卷数 内府藏本

明闵于忱编。于忱始末未详。是编凡分二种：一曰《谭史》，采苏、米《志林》议论；二曰《癖史》，杂记古人癖事。各加评点，总不出明季佻纤之习。

2061 《搗坚录》二十四卷 两淮盐政采进本

明朱廷旦撰。廷旦字尔兼，一号旋庵子，嘉善人。天启中贡生。是书分一百类，每类各为小序，陈劝戒之旨，而征引故实列于后，其末又缀以评论。其凡例谓：“主于破疑扫疾，故刺恶之条，溢于奖善。”称“搗坚”者，谓如病之刺其坚也。所言多主祸福，盖欲世俗易省耳。

2062 《萃古名言》四卷 浙江巡抚采进本

明赵民献编。民献，云南人。其书刻于崇祯初年。康熙中交河王琯官迤西道时得之于其子孙，已残阙失次。琯复增损其文。后任湖广学政时以授胡之太刊之。琯任满携版北归，楚士子复为重刻。故是书有南北二本，此即南本也。其书举先儒嘉言懿行分类编辑，凡四十六门，多不载所出。其凡例云：“或赵氏所自言，或他书所常见，故不复细加分别”。然体例殊不画一，各门之后，之太又添缀评语，尤为蛇足。琯字昭玉，交河人，康熙癸丑进士，官湖广提学副使。此本皆题王琯，盖传刻之误。之太字听岩，黄州人，其仕履未详。